

17. maji. 2017

**Tasiilami timmisartunut suluusalinnut mittarfissap ingerlatseqatigiiffiup suliassaanut ilaaqqullugu Kalaallit Airport A/S-mut nalunaaruteqaqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Justus Hansen, Demokraatit)

Siullermik Siumumiit nuannaarutigaarput siunnersuuteqartup periarfissanik ujartuerpalaartumik siunnersuuteqarnera.

Siumut maanamut ukiut arlaqalersuni nunatsinni mittarfeqarnikkut aaqqissuussinermi, aaqqissuusseqqinnissamilu, ullutsinnut tulluuttumik angallannikkut aaqqiniarnermi siuttuuvoq. Tamanna ilaatigut ukiakkut 2015-mi mittarfeqarnikkut aaqqissuusseqqinnissami Inatsisartut aaliangerneratigut takuneqarsinnaavoq. Maannakkut suliniutit arlaqartut ilusinikkiartuaarput, aammattaaq nuannaarutigaarput Tasiilami ukiorpassuarni oqallisaareerluni maannakkut sulinerit ingerlalernikuummata.

Maannamut mittarfissat nutaat ilusilersornerini suleriaaseq, aqqutissallu suut pitsaanerpaajunersut, sukkanerpaajunersullu assigiinngitsunik nalilersorneqarsinnaapput.

Naalackersuisut akissuteqaataanni tunngavilersuutit eqqartugaat tamarmik paasinarput, taamaattumik tamakkiisumik isiginnilluni sukumiisumik nalilersugassaasut Siumumiit isumaqarpugut.

Siumumiit isumaqarpugut Tasiilami mittarfiliortitsinissamut suliniutip sularineqarnera ima aallarterlaajutigisoq Naalackersuisut ataani ingerlateqqaarneqaruni pilertornerusumik siuariartornissaanut periarfissarissaarnerusoq, Kalaallit Airport ataanut ilineqarnermigut kigaallassarneqarsinnaammat. Taamaattumik Siumumiit Tasiilami mittarfissaq pilertornerusumik pivusunngortinneqarnissaa pillugu siunnersuut taama isikkulik itigartipparput.

Jens-Erik Kirkegaard, Siumut.